



**Cussegl da vischnaunca 13-2013/2016**  
Seduta dils 13 da zercladur 2014

---

## Protocol

dalla seduta dil cussegl da vischnaunca,  
**venderdis, ils 13 da zercladur 2014**, allas 20<sup>15</sup>- 22<sup>10</sup>uras  
en casa communal

---

**Presidi:** Flavio Murer

**Actuar:** Ervin Maissen

**Presents:**

- |                            |   |  |
|----------------------------|---|--|
| a) Cussegl                 | Armin Berther<br>Christoph Berger<br>Adrian Bigliel<br>Silvio Candinas<br>Edgar Durschei<br>Rita Huonder-Tenner<br>Wendelin Jacomet | Jordana Lozza-Desax<br>Armin Manetsch<br>Flavio Murer<br>Adrian Pally<br>Alfred Spescha<br>Marco Schmed<br>Rico Tuor |
| b) Suprastonza<br>communal | Francestg Cajacob<br>Madlen Deflorin-Spescha  | Cecilia Maissen-Desax<br>Iso Mazzetta  |
| c) Cumissiun da<br>gestiun | Beat Hosang<br>Manfred Caviezel   | Toni Huonder   |
| d) Perstgisas              | Roger Tuor  | Livio Zanetti  |
| e) Hosps                   | 5 persunas  |  |

"Jeu beneventel Vus alla tredischavla seduta dalla perioda d'uffeci 2013/2016 cheu en casa communal.

Oz ei buca mo venderdis, ils 13 oz salva il cussegl da vischnaunca era gest la 13avla seduta ed ultra da quei fatg vegn era gest aunc tractau questa sera il messadi nr. 13. Sut quei aspect supplicheschel jeu gia ussa da sestentar per in bien decuors dalla seduta.

Dumengia da miezdi savein nus sche nosa vischnaunca semova egl avegnir cun ina nov'embellaziun, signalisaziun ed informaziun ni vegnin nus confruntai cun in mussament da demotivaziun ni frustraziun en fuorma d'in „Game over!“

Preziadas cusseglieras, preziai cusseglers e preziada suprastanza. Nossa populaziun spetga gest ussa Vies engaschi cumplein en caussa ed accepta dil tuttatafatg buc ina tenuta reservada.

L'ovra Acletta ch'ei sin tractanda questa sera ei in bien mussament davart las instanzas politicas da preparar e procurar per entradas supplementaras cun nossas atgnas resursas.

Da l'autra vart vegnel a tedlar minuziusamein las expectoraziuns davart la gruppa da project per ina collaboraziun da scola en Sursassiala. Ina schanza unica munchentada buca gest da nosa vischnaunca, mobein da noss'entira regiun che piarda en mes egl adina dapli il sensori per la realitad. La finfinala essan nus tuts ensemen ils davos. Adina ed adina puspei.

Tgisà, forsa savess egl avegnir ina taglia sin energia negativa pil svilup da nosa regiun gidar a generar novas entradas?

Dapi la davosa seduta dil cussegl da vischnaunca han ils suandonts vischins bandunau il terrester.

Cun in bien patratg lein nus seregurdar da:

Claudia Levy-Soliva, da Funs, naschida ils 13 da schaner 1923 e morta ils 10 da matg 2014 e Peter Tenner-Schnoz, medemamein da Funs, bab da cussegliera Rita Huonder-Tenner, naschius ils 9 da fenadur1930 e morts ils 23 da matg 2014.

Els ruaussien en pasch.

Fetg grond plascher hai jeu da comunicar dapi nosa davosa seduta dil cussegl da vischnaunca 6 naschientschas:

Jara Finja Marie Hensler, Noel Hartung, Iris Guerreiro Jacinto, Roman Gadola, Elina Maria Jacomet e Sina Dermon senumnan nos novs vischins. Ad els in cordial beinvegni ed als loschs geniturs nosa cordiala gratulaziun.

Cunquei arvel la tredischavla seduta dalla perioda d'uffeci 2013/2016."

La gliesta da tractandas secloma sco suonda:

**Tractandas:**

1. Protocols nr. 11- e 12-2013/2016
2. Oвра Acletta: Project en detagl (messadi nr. 13-2013/2016)
3. Menaschi tecnic: Credit per la cumpra d'ina maschina  
(messadi nr. 14-2013/2016)
4. Postulat per in meglier access Claustra-Staziun-Salaplauna: Risposta (postulat  
nr. 1-2013/2016)
5. Collaboraziun da scola Sursassiala: Informaziun
6. Ura da damondas (conform ad art. 44 dil regulativ da fatschentas)

Cussegl da vischnaunca Disentis/Mustér  
Il president: Igl actuar:

Flavio Murer

Ervin Maissen



**Cussegl da vischnaunca 13-2013/2016**  
Seduta dils 13 da zercladur 2014

---

## **1. Protocols nr. 11- e 12-2013/2016**

President dil cussegl da vischnaunca

Ils protocols ein vegni tarmess tier per posiziun. Enteifer ils 5 dis fixai ei vegniu inoltrau neginas objecziuns.

*Ils protocols nr. 11-2013/2016 dalla seduta dils 21 da fevrer 2014 e nr. 12-2013/2016 dils 23 d'avrel 2014 vegnan approvai senza midadas.*

Cussegl da vischnaunca Disentis/Mustér  
Il president: Igl actuar:

Flavio Murer

Ervin Maissen



## 2. Ovra Aletta: Project en detagl (messadi nr. 13-2013/2016)

Suprastonza communal

En num dalla suprastonza communal ed a basa dil messadi nr. 13-2013/2016 sco era dils rapports aschuntai presenta president communal Francestg Cajacob la fatschenta.

### **Discussiun davart la debatta d'entrada**

Il cussegl da vischnaunca desista da menar ina discussiun generala davart quella fatschenta.

### **Discussiun en detagl**

Cussegl da vischnaunca

Da principi vegn ei beneventau che la suprastonza communal vul continuar cul project. Ord la documentaziun sortan indicaziuns differentas pertuccont la produziun d'energia. En in cass scrivan ins d'ina produziun da 5.5 GWh, en l'auter cass d'ina tala da 6.6 GWh. Tgei constat? Actualmein ei il recav ord la vendita dall'energia hidraulica fetg bass, aschia che la realisaziun da quell'ovra vegn ad esser pusseivel sulettamein cun las contribuziuns ord il KEV. Tgei posiziun prendan las organizaziuns pigl ambient en connex cun quell'ovra? Il WWF ei gia staus fetg critics en connex cun la realisaziun dall'ovra hidraulica da Russein.

Suprastonza communal

Actualmein ein ils recavs ord la produziun d'energia hidraulica fetg bass e senza las contribuziuns ord il KEV ei la construcziun d'ovras hidraulicas pintgas buca rentabla. La Confederaziun intenda da sortir entochen igl onn 2035 ord las ovras nuclearas cugl intent da rinforzar la produziun d'energias regenerablas. En quei connex gioga l'energia hidraulica in'impurtanta rolla.

L'ovra Val Aletta ei annunziada pil KEV. La fasa da planisaziun e projectaziun cuoza 3 entochen 5 onns. Per esser semtgai cun la realisaziun dil project sin che la Confederaziun decida davart il KEV eis ei d'avantatg da cuntinuar cun la planisaziun e projectaziun.

Cussegl da vischnaunca

Il cussegl da vischnaunca ha giu concediu in credit da frs. 100'000.-- per las sondaziuns e la suprastonza communal in tal da frs. 25'000.-- per mesiraziuns en la Val Aletta. Nua ein quellas expensas vegnidas cudischadas? Ein ils cuosts per las mesiras da cumpensaziun che vegnan pretendidas en connex cun la realisaziun da quei project cunteni el schazetg da cuosts? Tgei cuosts ein cumpri els cuosts annuals e co ein las amortisaziuns per l'ovra hidraulica previdas? 2013 ha la suprastonza communal numnau l'interpresa Energia Alpina sco ina pusseviva varianta da collaboraziun per optimar ils cuosts e per pli tard evtl. era saver colaborar. In'atgna ovra hidraulica vegness evtl. era dabien pli tard tier in'evtl. fusiun dallas vischnauncas. Con lunsch vegn il project coordinaus cun il project d'ennevar dallas pendicularas?

## Suprastonza communal

En connex cul recav ord l'OVra electrica Russein – a caschun dalla scadenza dalla concessiun avon temps – ha la vischnaunca endrizzau cul recav in fondo per la promoziun d'energias regenerablas. Sut quei tetel ein ils cuosts per l'OVra Val Acletta vegni cudischai. Ovras hydraulicas ein buca pussevlas senza mesiras da cumpensaziun, perquei ein quels cuosts integrai ella calculaziun dils cuosts da project.

Ils cuosts dall'investiziun vegnan amortisai sco suonda:

Baghetg e construcziuns mecanicas	enteifer 50 onns
Installaziuns electromecanicas	enteifer 35 onns
Pilotadis	enteifer 15 onns
Ulteriurs cuosts	enteifer 20 onns

Ensemen cun l'Energia Alpina emprovan ins da nezegiar sinergias avon maun. Da principi vul la vischnaunca denton realisar il project en atgna reschia per haver la basa da saver fixar cura ch'il project ei avon maun, in partenari dalla branscha. La vischnaunca duei saver decider co e sut tgei cundiziuns che l'ovra sa vegnir realisada.

La collaboraziun cun las pendicularas ei d'impurtonza. Cunzun sil sector dall'aua restonta eis ei necessari ch'ils projects vegnan coordinai.

## **Decisiun**

*Cun 14 encunter 0 vuschs e 0 abstenziuns decida il cussegl da vischnaunca:*

- *da conceder in credit da frs. 250'000.-- per l'elaboraziun d'in project en detagl OVra Acletta;*
- *da suttametter il credit tenor art. 21, lit. c dalla constituziun communal al referendum facultativ;*
- *d'adossar ils cuosts per il project en detagl alla reserva speciala, creada per las energias regenerablas (cto. 288.01).*

Cussegl da vischnaunca Disentis/Mustér

Il president:

Igl actuar:

Flavio Murer

Ervin Maissen



### 3. Menaschi tecnic: Credit per la cumpra d'ina maschina (messadi nr. 14-2013/2016)

Suprastonza communal

Gerau Iso Mazzetta presenta la fatschenta a basa dil messadi nr. 14-2013/2016. In impurtont aspect ei il fatg ch'ina fatschenta indigena sappi garantir da tut temp in servis irreproschabel per la maschina.

#### ***Discussiun davart la debatta d'entrada***

Cussegliaer Wendelin Jacomet

“Il messadi cuntegn numerusas informaziuns sur dil transporter “Meili” che duess vegnir remplazzaus. La maschina nova duei survir per tuttas sorts transports, pusseivladad da pender vidlunder in carr annex, esser movibla ed adattada a nossas vias stretgas e sto corrispunder allas prescripziuns da svapur actualas. Per tala cumpra basegna ei in credit da frs. 180'000.00. Sin pagina 2 e 3 dil messadi vegn descret detagliadamein la prestaziun da lavur en uras ch'ei vegnida exequida cun quella maschina durant ils davos 12 onns. Quei ch'ins tscherca el messadi ein ils cuosts dil vehichel niev cun igl accessori ed ina evaluaziun dil parc dallas maschinas communalas. Ch'il “Meili” sto vegnir remplazzaus enzacu stat buca en discussiun, mo cura che quei ei necessari. Il program d'investiziun preveda pigl onn 2014 la summa da frs. 220'000.00. Cuosta quei vehichel niev cun tut igl accessori rodond frs. 180'000.00 muntass l'amortisaziun annuala sur 10 onns a ca. frs. 18'000.00, vidlunder vegn il tscheins da rodond frs. 2'000.00, il manteniment da rodond frs. 3'000.00, pneus, segiradas etc., lu vegnin nus beinspert sin ina summa da frs. 25'000.00 ad onn. Il “Meili” ha giu igl onn vargau cuosts da ca. frs. 15'000.00 ed uonn entochen il di dad oz frs. 7'000.00. Tenor mia constataziun fussen ils cuosts pil vehichel vegl aunc adina pli bass. Per saver conceder in credit da frs. 180'000.00 giavischass jeu che las informaziuns detagliadas davart la maschina nova vegnan descrettas el messadi.

Tgei cuosta quei vehichel niev, il manteniment e cu ei quel amortisau? Cheu less jeu veser silmeins 3 offertas da differents tips e da differents sorprenders indigens. Con eis ei vegniu offeriu per il vehichel existent “Meili”? Jeu mondel da quei anora che quei vehichel niev porti silmeins las medemas dimensiuns ni prestaziuns. El program d'investiziun eis ei previu igl onn 2015 ina summa da frs. 60'000.00 per la cumpra da maschinas. Da tgei cumpra setracta ei cheu? En quei connex eis ei buca d'emblidar il pei da taglia communal che munta aunc adina a 120%.

El messadi (messadi 50-2009/2012) per la cumpra dalla maschina “Holder”, per la quala il cussegl ha concediu in credit da frs. 175'000.00 ei la maschina vegnida descretta en detagl. Tier quella fatschenta ha la suprastonza communal giu menziunau ch'ei detti la pusseivladad da brattar certs moduls denter las vischnauncas vischinontas. Beinspert han ins constatau che tut las vischnauncas drovan il medem mument ils moduls sco per exempel il taglianeiv. Quei ch'ins haveva gia lu fatg attents ils responsabels. Il taglianeiv ha lu tuttina stuiu vegnir cumpraus pli tard.

Jeu fetschel perquei la proposta da buca entrar en detagl e dar anavos la fatschenta alla suprastonza per surluvrar en detagl e presentar quella tier ina dallas proximas sedutas.”

#### Suprastonza communal

La damonda da credit ei sefatga sin fundament d'ina offerta directiva. La submitsiun duei haver liug pér suenter ch'il credit ei vegnius concedius. Ils criteris che la maschina sto ademplir ein vegni descrets el messadi. El cass dalla maschina Holder eran pli biars criteris enconuschents ordavon e perquei eis ei stau pusseivel da sefocussar sin in product concret. Ils cuosts da menaschi pil "Meili" ein s'augmentai ils davos dus onns marcantamein ed ei fa senn da remplazzar quella maschina avon ch'ils cuosts da manteniment prendan ina fuorma nuncontrollabla.

La submitsiun duei vegnir menada atras sco quei succeda entras il cantun. Per sesez eis ei previu d'envidar las interpresas indigenas d'inoltrar offertas per la furniziun dalla maschina. Enviers il plan d'investiziun han ins gia saviu reducir la summa previda per frs. 40'000.--. El rom dalla submitsiun vegn ins a saver eruir tgei ch'ins sa recaltgar per la maschina existentia, quei che sa aunc inagada haver influenza sils cuosts previ.

#### Cussegl da vischnaunca

Giavischa enconuschientscha davart il tip da maschina che duei vegnir cumpraus avon che conceder il credit. Il remplazzament dalla maschina vegn buca mess en damonda. Eis ei evtl. era pusseivel d'ademplier l'incarica cun ina maschina pli favoreivla? Evtl. duess ins sclarir variantas en quella direcziun.

Per saver ademplir las incaricas basegna il menaschi tecnic las maschinas ed ils uaffens necessaris. Perquei duei il credit per la maschina vegnir concedius. Impurtont ei ch'ina fatschenta indigena sappi furnir la maschina e cheutras era possibilitar in bien servis.

Cuntegn il credit da frs. 180'000.-- tut ils cuosts per l'iseglia necessaria?

#### Suprastonza communal

El rom d'ina submitsiun eis ei buca pusseivel da schar offerir variantas. La vischnaunca sto comunicar a tuts offerents ils medems criteris. Ils criteris ston vegnir adempli per che las offertas sappien vegnir risguardadas.

La damonda da credit sebasa sin offertas directivas e cuntegn tut ils accessoris necessaris per saver ademplir la lavur.

#### **Decisiun**

*Cun 8 encunter 6 vuschs decida il cussegl da vischnaunca en favur dalla proposta da cusseglier Wendelin Jacomet da remetter la fatschenta alla suprastonza communal cun l'incarica da cumpletar la documentaziun tiel messadi nr. 14-2013/2016.*

Cussegl da vischnaunca Disentis/Mustér  
Il president: Igl actuar:

Flavio Murer

Ervin Maissen





#### 4. **Postulat per in meglier access Claustra-Staziun-Salaplauna: Risposta (postulat nr. 1-2013/2016)**

Cussegliaer Christoph Berger

Il project tenor siu postulat possibilitescha ina realisaziun en etappas tenor las pusseivladads finanzialas dalla vischnaunca. L'emprema etappa stat en connex cun l'intenziun dalla suprastonza communal che vul procurar in access naven dalla staziun dalla Viafier retica enviers Salaplauna. L'etappa enviers la claustra riguarda il fatg che pli e pli biaras personas cun e senza impediments corporals fan diever dil traffic public. La colligaziun cun ina galleria ed in ascensur enviers la claustra evtl. cun in secund ascensur sin l'altezia dil Vitg augmentassen grondamein l'attractivitat dalla claustra e dil Vitg per viandonts e colligiass quels treis centers in cun l'auter.

En l'emprema fasa va ei per eruir ils cuosts, en ina secunda fasa savess ins ponderar co las singulas etappas san vegnir realisadas.

Suprastonza communal

La suprastonza communal ha surdau in'incarica al biro d'inschignier Walter Bieler per in studi d'ina colligaziun naven dil sutpassadi dalla staziun cun Salaplauna. En quei connex vegn era gest examinau l'idea d'in ascensur a Raveras.

Pertuccont l'ulteriura part dil postulat ei la suprastonza communal dil meini, che la prioritad seigi memia pintga e la probabilitad per ina realisaziun strusch avon maun. Ei setracta d'ina visiun, che drova denton aunc in per ponderaziuns. Aschia propona la suprastonza communal da buca acceptar il postulat cun risguardar el studi gia l'emprema etappa tenor l'incarica gia dada.

Cussegl da vischnaunca

L'idea per la realisaziun dil project ei buna. Il postulant less enconuscher ils cuosts per quei project. Silsuenter san ins sediscuorer davart la realisaziun. Era pil postulant eis ei clar che quei project sa vegnir realisau sulettamein en etappas.

#### **Decisiun**

*Cun 1 encunter 13 vuschs decida il cussegl da vischnaunca da renviar il postulat.*

Cussegl da vischnaunca Disentis/Mustér  
Il president: Igl actuar:

Flavio Murer

Ervin Maissen



## 5. Collaboraziun da scola Sursassiala: Informaziun

### Suprastonza communal

Geraua Madlen Deflorin-Spescha informescha davart il stan dallas contractivas en connex cun ina collaboraziun sil sector dil scolaesser en Sursassiala.

“Bugen havess jeu presentau oz a Vus in project per in consorzi da scola Sursassiala en tuts detagls. Enstagl sai jeu mo aunc comunicar a Vus in per caussas dalla situaziun actuala.

Igl atun 2012 ha la suprastonza communal da Tujetsch tschentau la damonda allas vischnauncas da Medel e da Mustér pertuccont ina collaboraziun pli stretga sil sector da scola. L’entschatta 2013 ei vegniu installau ina cumissiun cun representants da tuttas treis vischnaunca q.v.d. culs geraus dil departament da scola ed ils presidents dils cussegls da scola. Dalla vischnaunca da Medel han fatg part geraus Emil Pally ed Arnold Flepp, president dil cussegl da scola. Per la vischnaunca da Tujetsch geraus Eveline Soliva e Bruno Berther, president dil cussegl da scola e per la vischnaunca da Mustér geraus Madlen Deflorin-Spescha ed il president communal Francestg Cajacob che ha surpriu il presidi dalla cumissiun, sco anteriur president dil cussegl da scola. Damai ch’ei era gia vegniu fatg avon in’emprova da colaborar ch’era buca gartegiada, ein ins sedecidius da schar accumpignar ina persuna externa quei project. Signur Wenger ha gia accumpignau biaras fusiuns da scolas cun success, sco per exempel quella da Sumvitg/Trun, ed ei fetg cumpetents. Signur Wenger ei semess alla lavur da tschaffar tuttas cefras avon maun; diember da scolars, dallas personas d’instrucziun, las casas da scola, hallas da gimnastica e tut las ulteriuras cefras che han da far cul menaschi da scola e ch’ein secapescha relevantas pil svilup dil diember da scolars e dils menaschis da scola. La finamira ei stada d’elaborar il project sin la primavera 2013. Suenter seras d’informaziun per ils scolasts, pils cussegls da scola e pil pievel en tuttas treis vischnauncas havess la fatschenta giu da vegnir tractada els cussegls da vischnaunca e lu decida igl atun 2013 all’urna. El cass ch’il project fuss vegnius approbaus, havess ei giu temps avonda da reglar transports, measas da miezdi e.a.v. cun l’entschatta digl onn da scola 2014/15.

Sco Vus haveis saviu leger el rapport era ei previu da prender ensemen il scalem superiur da tuttas treis vischnauncas a Mustér. L’entschatta era aunc previu ina varianta d’unir igl emprem e secund scalem superiur a Mustér ed il tierz scalem en Tujetsch, quei en rama d’in dar ed in prender. Per il tierz scalem a Tujetsch era ei previu in program special cun preparar ils scolars pli specificamein sin la veta professiunala ni in studi. El decuors dalla stad 2013 ha il cantun communicau, ch’ei seigi el rom dil model C buca lubiu da trer dapart il scalem superiur. Denton ei vegniu ofniau davart dalla vischnaunca da Tujetsch il giavisch da schar in tec dapli peda per la realisaziun e stuschar la votaziun sin primavera 2014. Deplorablamein ei l’opposiziun davart dils scolasts da Tujetsch vegnida pli e pli gronda. Ed avon ch’entscheiver ad organisar seras d’informaziun ha la suprastonza communal da Tujetsch sondau, co l’acceptanza dil project sepresenta. Il cussegl da scola era buca unanimamein per il consorzi ed el cussegl a vischnaunca era l’acceptanza fetg pintga e la probabladad d’ina disdida

fetg gronda, aschia che la suprastanza communal da Tujetsch ha decidiu da sistir il project pil mument e da buca ir all'urna. Con liungs che quei mument cuoza sa negin pil mument. Cun la vischnaunca da Medel essan nus ussa en contractivas, en tgei fuorma e co ei va vinavon, en mintga cass buca en fuorma d'in consorzi da scola. Ils scolars dil scalem superiur da Medel vegnan gia dapi biars onns a Mustér a scola e naven digl uost 2014 vegnan era ils scolarets da scoletta a Mustér."

#### Cussegl da vischnaunca

Eis ei veramein necessari da seconcentrar adina mo sin las vischnauncas da Sursassiala? Pertgei duess ins buca era saver seconcentrar engiuvians pertuccont ina collaboraziun? Co funcziuna il model C e pertgei duess ina slihaziun decentrala en duas vischnauncas buca esser pusseivla?

#### Suprastanza communal

Il Model C lubescha als scolars dall'emprema e secunda classa dil scalem superiur da midar classa ni singuls romstenor lur habilitads resp. enconuschientschas, p. ex. matematica en scola secundara e tudestg en scola reala. Il tierz onn denton dat ei negina pussevkladad da brattar pli ils roms.

Il giavisch per ina collaboraziun sil sectur da scola ei vegnius davart dalla vischnaunca da Tujetsch. La collaboraziun engiuvians ei in opziun pusseivla, denton eis ei actualmein pli impurtont da schar peda per schar medirar la causa. Impurtont ei che la qualitat dalla scola piteschi buca. Pigl avegnir lai il svilup dallas naschientschas en nosa vischnaunca presupponer plitost in lev carschament dil diember da scolars.

Cussegl da vischnaunca Disentis/Mustér

Il president:

Igl actuar:

Flavio Murer

Ervin Maissen



## 6. Ura da damondas (conform ad art. 44 dil regulativ da fatschentas)

Suprastonza communal

Igl ei vegniu inoltrau neginas damondas a scret.

Cussegl da vischnaunca

1. El fegl official ei vegniu communicau ch'ei vegni concediu neginas lubientschas da carrar dil di per la Via Run. Tgi ei responsabels en cass ch'ei capeta tuttina in accident?
2. La vischnaunca ha realisau, resp. ei lundervi da preparar entginas sendas novas. Ins constatescha denton che sendas existentas piteschan persunter en connex cul manteniment e segar. Evtl. savess la vischnaunca surdar ad uniuns ni persunas privatas singuls tschancuns per mantener.
3. Ils differentes begls da fluras ch'ei vegni realisai el Vitg meretan in cumpliment ed engraziament als responsabels.
4. Cura eis ei previu da realisar ils molocs sil parcadi Claustra? Gia igl onn vargau han ins giu empermess da sanar la senda che meina naven da Mumpé Medel sur Vergera. Cura vegnan quellas lavurs realisadas? Basegns havess era la via da velos naven da Mumpé a Fontanivas. Plinavon duess ins appellar als purs da desister da rischlar dumengias sco Tschuncheismas ed autras fiastas.

Suprastonza communal

1. La Via Run ei en schliet stan ed igl ei prigulus da schar carrar sin quella via persunas ch'enconuschan buca quella. Perquei vegn concediu neginas lubientschas dil di. Las lubientschas permanentas per officials e persunas che ston far diever dalla via ein vegnidas concedidas pigl onn 2014. Per la Via Run exista in scamond da carrar per vehichels a motor. Tgi che fa diever dalla via senza lubientscha ei sez responsabels e sto quintar da vegnir punius pil surpassament dalla signalisaziun. Ensemen cugl uffeci da meglieraziun ed igl uffeci d'uaul e prighels dalla natira ein ins lundervi da sclarir ina varianta raschuneivla per in access niev pigl uaul dil Run.
2. La suprastonza communal ha gia envidau – cun pign success – persunas da s'annunziar per lavurs da manteniment. Aschinavon ch'ei dat talas persunas, pren la vischnaunca bugen encunter talas annunzias.
4. La claustra ha stuschau la construcziun dallas garaschas per la Casa Sontget sin suenter las vacanzas da stad. Las lavurs pils molocs sco era la sanaziun dallas fatschadas dallas tualettas vegnan cumbinadas cun quellas lavurs.

La sanaziun dalla senda naven da Mumpé Medel sur Vergera ei integrada el program da lavur dil menaschi tecnic.

Ord vesta dalla vischnaunca fa ei buca senn d'introducir reglas pertuccont rischlar la dumengia. Denton va la suprastanza communal d'accord ch'ei stuess buca gest esser rischlau ina dumengia da Tschuncheismas l'entschatta dalla stad. Cheu ei l'uniun purila envidada d'intervegnir tier lur commembers ch'ins prendi il duiu risguard.

#### President dil cussegl da vischnaunca

Fa attents sin entginas occurrenzas che han liug il proxim temps en vischnaunca. Plinavon envida el ils presents da reservar il termin dils 22 d'uost 2014 naven da ca. allas 15<sup>30</sup> uras per la seduta campestra. Il program detagliau vegn tarmess tier pli tard.

#### Suprastanza communal

Il president communal informescha davart il workshop ch'ei previus per sonda, ils 30 d'uost 2014 concernent l'analisa dallas finanzas. Avon quella seduta vegn tarmess als commembers dil cussegl da vischnaunca in questiunari per eruir ils temas specifics che duein vegnir discutai ils 30 d'uost. Sco cussegladers funcziuneschan Ursin Fetz sil sector da dretg e Curdin Derungs docent sil sector dall'economia. Omsidus cussegladers derivan dalla scola aulta da tecnica ed economia HTW a Cuera. El lai reparter als presents ina survesta che dat in'investa davart las preparativas per la dieta dils 30 d'uost 2014.

Cussegl da vischnaunca Disentis/Mustér  
Il president: Igl actuar:

Flavio Murer

Ervin Maissen

Disentis/Mustér, ils 23 da fenadur 2014

G:\Uffeci baghegiar\Cussegl da vischnaunca\Cussegl da vischnaunca 2013\_16\Protocols\Cus0016\_13.docx